

yang demikian itu dikatakan salah – begitulah kecilnya, begitulah nasibnya pelajaran agama di tanah air kita ini. Sebab itu, yang demikian haruslah menjadi perhatian seluruh umat Islam supaya bekerja untuk menegakkan agama dengan amal bukan dengan perkataan dan janganlah menjadikan agama itu sebagai topeng untuk lompatan mencari kedudukan dan kekuasaan.

* * *

Jawatankuasa Ejaan Di Singapura

Kementerian Kebudayaan kerajaan Republik Singapura telah menubuhkan suatu Jawatankuasa Ejaan untuk mengadakan ejaan-ejaan dan menyamakan ejaan-ejaan itu bagi seluruh Singapura yang luasnya tidak berapa batu persegi – atau ratusan batu persegi sahaja. Sekali imbas memang bagus, memang baik adanya Jawatankuasa Ejaan itu tetapi memandang kepada penggunaannya dan memandang kepada kemungkinan ejaan itu diterima oleh umum adalah mungkin payah sekali. Begitu juga kemungkinan-kemungkinan kerjasama daripada penerbit-penerbit tempatan untuk menyertai ejaan itu, jika ia berlainan dengan ejaan awam, adalah tipis dan mungkin harus tidak didapat.

Siaran buku-buku kalau hanya untuk Singapura sahaja tidaklah dapat diusahakan oleh penerbitan-penerbitan yang akan bergantung usaha-usahanya kepada Malaysia atau lainnya, kerana yang demikian ini tidak akan memadai.

Penggunaan ejaan di tempat-tempat yang begitu sempit seperti pulau Singapura ini tentulah akan ditertawakan orang dan mengertilah orang, barangkali, bahawa adanya itu hanya sebagai melepaskan batuk di tangga untuk menunjukkan bahawa di Singapura ada kegiatan-kegiatan di dalam pelaksanaan bahasa kebangsaan padahal di dalam umunya bahasa kebangsaan itu hampir-hampir sama tarafnya dengan bahasa-bahasa yang lain yang menjadi bahasa bersama di pulau Singapura ini.

Jadi, menurut pendapat kita, bahawa adanya

Jawatankuasa Ejaan itu tidaklah akan memberi manfaat dan tidak akan dapat dilaksanakan kerana jika hendak mengadakan usaha-usaha di dalam menyatukan ejaan maka hendaklah sekurang-kurangnya di antara Singapura dan Malaysia seluruhnya bersatu dan bersama – ini ada kemungkinan boleh memberi manfaat dan boleh dilaksanakan.

* * *

Peristiwa-peristiwa Di Pejabat Haji Singapura

Yang Patut Diperhati

Di Singapura diadakan oleh kerajaan sebuah pejabat haji yang bakal mengurus permintaan-permintaan orang yang hendak pergi haji dan mengeluarkan pasport-pasport khas untuk orang-orang yang pergi haji dengan kapal laut. Pejabat ini juga yang bertanggungjawab bekerjasama dengan syarikat kapal yang membawa orang haji bagi memberi tempat-tempat di kapal dan pejabat ini juga menjadi tumpuan dan kerjasama daripada syeikh-syeikh haji di Singapura kerana di sitolah tempat mereka berhubung dalam segala-galanya.

Baharu-baharu ini ada satu peristiwa yang nampaknya mustahak menjadi perhatian iaitu menentukan syeikh-syeikh haji bagi orang-orang yang hendak menunaikan haji di Mekah. Tiap-tiap orang haji yang hendak menunaikan fardu haji di Mekah adalah bebas memilih siapa-siapa juapun bakal syeikh mereka di Mekah itu.

Pegawai atau pejabat haji tidak berhak untuk menentu atau memilihkan siapa syeikh yang bakal dikehendaki mereka buat duduk di Mekah, dan umum mengetahui bahawa tidaklah menjadi satu perkara yang tidak mungkin, menjadi kebiasaan bagi syeikh-syeikh Mekah kepada orang-orang yang bakal menghantar jemaahnya, memberi habuan kepada mereka dan kerana itulah pejabat yang menjadi tumpuan untuk mengadakan pasport tidak sepatutnya mencampuri soalan-soalan ini kerana mungkin menimbulkan sangkaan-sangkaan yang